



Lirieke van Jannie du Toit se album

Die maan deur 'n gaatjie in die nag

liedjies van Marie Tredoux en Jannie

vanaf die webblad www.janniedutoit.com

MIS OOR JACOBSBAAI

Musiek: Marie Tredoux
Teks: Marie Tredoux

Die deinserigheid oor die baai
Word in 'n omsientjiesyd 'n digte mis
Wat slenter en swaai en dwarrel en draai in die baai
Die deinserigheid oor die baai
Word in 'n japtrap se tyd 'n digte mis
Wat slenter en swaai waar meeue bohaai
en bohaai en bohaai in die baai
 En die mishoring kreun en die mishoring steun oor die baai
 'n Knaende klank van Columbine
 Soos die liedjie van Auld Lang Syne

Die deinserigheid oor die baai
Word in 'n handomkeertyd 'n digte mis
Wat langvinger tas waar skuim spoel en was in die baai
Die deinserigheid oor die baai
Word in 'n seepbel se duur 'n donskomers
Wat snoesig kom lê oor rots en oor boot
Oor rotse en bote wat klou en kleef
Waar die meeue bohaai in die baai
 En die mishoring kreun en die mishoring steun oor die baai
 'n Knaende klank van Columbine
 Soos die liedjie van Auld Lang Syne

Die dik mis hier oor Jacobsbaai
Wag vir die son om te lig en dan ontstaan
'n Sprokiesgesig as als wat verdwyn het verskyn
Die dik mis wat wyk voor die son
Laat net 'n deinserigheid wat talm en toef
En als wat verskyn glim soos perlemoen;
'n Prentjie verskyn soos in Brigadoon!
En die meeue bohaai oor die baai
 Ja, die mishoring staak die gesteun en gekreun oor die baai
 En die mishoring swyg by Columbine
 Oor die liedjie van Auld Lang Syne

Die deinserigheid oor die baai
Wyk in 'n omsientjiesyd voor die son en boot
En rots lê en glim en gloei in die gloed
Waar die meeue bohaai en bohaai.